


Restaurant El Gaucho a gana Premio na Madrid, Spaña y na Frankfurt, Alemania



Oranjestad: Ora cu bo alcanza un meta por ta e resultado di diferente factor y logronan di hopi cu a traha pe. E parti mas dificil ta pa bo mantene y semper trata na super'e, cual porcierto ta masha poco ta logra alcanza

For di January 31 te cu February 2 di e aña aki Madrid tabata e sede pa e di 26 edicion di Trofeo internacional pa Turismo, Hoteleria y Gastronomía. Por cierto e galardón aki a origina na Spaña kendenan tabata tin e iniciativa pa cuminsa premia empresanan priva y organisacionan oficial. Empresanan cu ta lucha tur dia pa mehoracion y calidad di e turismo di nan pais.

E XXVI Trofeo 2001 a wordo diseña pa reconoce e prestigio di companianan y organisacionan cu ta

traha den Turismo, Hoteleria y Gastronomía internacionalmente. Esaki ta un bon oportunidad pa anualmente tur esnan vincula haña e oportunidad pa sera mas cu otro profesionalmente. E ceremonia aki tradicionalmente ta wordo teni conhunto cu International Tourism Fair, FITUR cual ta un di e eventonan mas primordial den e mundo turistico.

E trofeo cu ta un simbolo di un Toro Bravo Spaño ta e muestra di testimonio pa anhelo profundo di paz y entendimiento entre humanidad.

Aruba su number tambe a aparece ariba e lista di mas di 100 pais cu a wordo honra cu dicho premio. Un carta a wordo manda den luna di October aña pasa na gerente general di El Gaucho restaurant, na unda cu

nan a wordo avisa y invita pa 26th International Award for tourist, hotel and catering industry cual galardón a wordo crea conhuntamente cu Trade Leaders Club. El Gaucho a gana e trofeo di aña 2001 den e ramo di restaurant.

El Gaucho restaurant cu situa den Wilhelminastraat 80, na unda turistanan for di tur parti di mundo no ta bolbe nan pais di origen, sin come, na nan steakhouse preferi.

Sra. Omira Frank ta maneha e restaurant conhuntamente cu su esposo y su ruman muher. Durante añanan e restaurant a expande te na un total di 250 cupo, un dining room parti ariba cu su lift, un bar lounge y un cushina moderno. Tambe e tin su mesun laundry, te asta un cocktail, cigar lounge cu entretenimiento en bibo diariamente.

Na aña 1997 a celebra engrande e 20 aña di existencia na unda cu e fiesta aki ainda ta wordo recorda. Awe cu nan ta celebra 24 aña di existencia cu hopi orguyo y emocion Gerencia di El Gaucho a ricibi nan prome y segundo premio, esaki sigur ta un estimulo grandi pa nan, pa por continua cu nan bon trabao den e mundo di gastronomía.

Restaurant El Gaucho no solamente ta brinda su servicio na turistanan pero sigur tambe na nos localnan cu a hasi El Gaucho nan restaurant preferi na Aruba. El Gaucho semper pendiente di tur actividad y cu cupo

di 500 cliente pa dia, semper ta sigui inverti den mehoracion constante pa por brinda un mihor servicio. Nan orario di servicio ta di 11:00 a.m. – 11:00 p.m. sera ariba diadomingo. Como entretenimiento special nan tin un duo guitarista cu ta complace mesa pa mesa tur anochi. Un gradicimento sigur ta bay na e staff y personal chempelar cu ta esnan cu den un forma profesional ta atende e clientenan. Cu hopi animo nan ta duna e servicio optimal manera e cliente merece y e actitud aki sigur a contribui grandemente pa e premio aki y otronan.

Sra Omira Frank cu orguyo a menciona cu nan a ricibi un otro carta for di International committee of B.I.D., Business Initiative Directions di Frankfurt, Alemania kendenan a duna nan di conoce cu El

Gaucho tambe a gana "Arch of Europe for Quality Award". E premiacion aki sigur ta di vital importancia pa El Gaucho ya cu esaki ta a base di votacion ariba nan website a ricibi e distincion aki. Un premio cu e ta ricibi cu hopi orguyo ya cu esaki ta e muestra real di e popularidad y gusto di e clientenan.

Unico den nan estilo, cu carni di calidad halto procedente di Argentina a pone nan haña e respet y atencion Internacional y cu ultimamente nan a ricibi e dos distincionan aki.

Sra Cotarelo, Sra. Omira y esposo Michel y Maria Alicia sigur por ta orguyoso di nan Exitos.

Durante di e galardón Omira den compania di su querida mama a subi esenario pa ricibi nan Trofeo.

